

KORIĆANSKE STIJENE

Informator

Ovaj informator sadrži ažurirane informacije o pomoći koju Međunarodna komisija za nestale osobe (ICMP) pruža vlastima Bosne i Hercegovine (BiH) u procesu pronalaženja i identifikacije osoba nestalih na lokaciji Korićanske stijene u centralnoj BiH, još od prvih iskopavanja koja su vršena 2003. godine.

ICMP je ovaj informator pripremio kako bi porodice nestalih, bosanskohercegovačke vlasti i javnost bili detaljno informisani o naporima koje ICMP ulaže tokom posljednjih 15 godina, pružajući pomoć u identifikaciji žrtava i istrazi o masakru koji se 1992. godine dogodio na Korićanskim stijenama.

- Do augusta 2019. godine ICMP je Institutu za nestale osobe Bosne i Hercegovine (INO) dostavio izvještaje o podudaranju DNK na temelju kojih je omogućena pouzdana identifikacija 181 osoba nestalih na lokaciji Korićanske stijene.
- Međunarodni krivični sud za bivšu Jugoslaviju (MKSJ) je utvrdio da su 21. augusta 1992. godine snage bosanskih Srba prebacile veliku grupu civila iz logora Trnopolje na teritoriju Travnik, pod kontrolom bosanske vlade. Kada je kolona došla do planine Vlašić, policajci snaga bosanskih Srba su iz glavne grupe izdvojili oko 200 nenaoružanih osoba i strijeljali ih. Njihova su tijela bačena u provaliju na Korićanskim stijenama. Samo je dvanaest muškaraca preživjelo masakr.
- U periodu od 2003. do 2017. godine nadležni organi BiH su u četiri navrata vršili iskopavanja na lokaciji Korićanske stijene. ICMP je pružao pomoć u tri navrata i provodio pregled, uzorkovanje i testiranje DNK za žrtve pronađene prilikom sva četiri iskopavanja.
- Prije iskopavanja 2017. godine, ICMP je izdao pozitivne izvještaje o podudaranju DNK za 118 osoba i izvještaje o podudaranju DNK za 322 reasocijacije (povezivanje razvojenih dijelova tijela). Do danas su nadležna tužilaštva i INO pouzdano identifikovali 70 od 118 nestalih osoba i vratili ekshumirane posmrtno ostatke porodicama na ukop. Porodice preostalih 48 osoba - za koje je ICMP pronašao podudarnost DNK, ali su njihova tijela nekompletna - odlučili su čekati sa ukopom dok se pronađe više posmrtnih ostataka.
- Posljednja ekshumacija je provedena između 11. i 22. septembra 2017. godine, uz ICMP-ovu pomoć. Tokom te dvije sedmice pronađeno je 111 slučajeva posmrtnih ostataka.
- U periodu 11. oktobar – 23. novembar 2017. godine, nadležni specijalista sudske medicine je, uz ICMP-ovu pomoć, uzeo 1.242 postmortalna uzorka (kosti i zubi) i dostavio ih ICMP-u na testiranje DNK.
- ICMP je prvi izvještaj o podudaranju DNK, za posmrtno ostatke ekshumirane 2017. godine, INO-u dostavio u maju 2018. godine. Od tada se izvještaji o podudaranju DNK za žrtve ubijene na Korićanskim stijenama dostavljaju ustaljenim tempom.
- Na temelju postmortalnih uzoraka, dostavljenih nakon četiri iskopavanja na lokaciji Korićanske stijene, ICMP je do juna 2019. godine INO-u dostavio ukupno 1136 izvještaja o podudaranju DNK, koji se odnose na 181 nestalu osobu i 955 reasocijacija.
- 20. jula 2019. godine, 86 osoba je formalno identifikovano i ukopano, od toga je 81 osoba pronađena na Korićanskim stijenama dok je preostalih 5 pronađeno na drugim lokacijama u Krajini. Pored toga, četiri osobe pronađene na Korićanskim stijenama su formalno identifikovane i ukopane na drugim lokacijama – jedna u Kotor Varoši, a tri u Hrvatskoj.
- Početni DNK uzorci, kao i uzorci ponovno predati nakon neuspješne ekstrakcije DNK profila iz

početnog uzorka, trenutno se obrađuju, a nakon dovršetka dovešće do:

- reasocijacija dijelova tijela sa slučajevima koji nisu ukopani na kolektivnoj sahrani 2019. godine;
 - neophodne reekshumacije i reasocijacije sa slučajevima koji su identifikovani i ukopani prethodnih godina.
- Informacije o dostavljenim izvještajima o podudaranju DNK dostupne su putem ICMP-ovog Centra za online upite (<http://bit.ly/2FcKKf2>), gdje porodice mogu u stvarnom vremenu provjeriti status slučaja svoga srodnika.